

四庫全書

經部

欽定四庫全書

子部
儒門事親卷十三

詳校官太醫院吏目臣宋桂

編修臣倉聖脈覆勘

總校官原任中允臣王燕緒

校對官中書臣呂雲棟

謄錄監生臣張炳

欽定四庫全書

儒門事親卷十三

金 張從正 撰

劉河間先生三消論

因在前此書未傳於世
恐為沉沒故刊而行之

易言天地自太虛至黃泉有六位內經言人之身自頭
至足亦有六位今余又言人胸腹之間自肺至腎又有
六位人與天地造化五行同一爐鞴知彼則知此矣故
立天之氣曰金與火立地之氣曰土與水立人之氣曰

風與火故金火合則熱而清水土合則濕而寒風火合則溫而炎人胸腹之間亦猶是也肺最在上為金主燥心次之為君火主熱肝又次之為風木主溫膽又次之為相火主極熱脾又次之為濕土主涼腎又次之黃泉為寒水主寒故心肺象天脾腎象地肝膽象人不知此者不可與論人之病矣夫土為萬物之本水為萬物之元水土合德以陰居陰同處乎下以立地為氣萬物根於地是故水土濕寒若燥熱陽實則地之氣不立萬

物之根索澤而枝葉枯矣五常政大論曰根於中者命曰神機是為動物根本在於中也根本者脾胃腎也食入胃則脾為布化氣味榮養五藏百骸故酸入肝而養筋膜苦入心而養血脉甘入脾而養肌肉辛入肺而養皮毛鹹入腎而養骨髓五氣亦然故清養肺熱養心溫養肝濕養脾寒養腎也凡此五味五氣太過則病不及亦病惟平則常安矣故六節藏象論曰五味入口藏於腸胃味有所藏以養五氣氣和而生津液相成神乃自

生是其理也又太陰陽明論云脾病而四肢不用者何也岐伯曰四肢皆稟氣於胃而不得至經必因於脾胃乃稟也今脾病不能為胃行其津液不得稟水穀氣脾日以衰脉道不利筋骨肌肉皆無氣以生故不用焉帝曰脾不主時何也岐伯曰脾者土也治中央常以四時長四臟各十八日寄治不得獨主於時也脾藏者常着胃土之精也土者生萬物而法天地故上下至頭足不得獨主於時也帝曰脾與胃以道相連爾而能行其津

液何也岐伯曰足太陰者三陰也其脉貫胃屬脾絡噤
故太陰為之行氣於三陰足陽明者表也五臟六腑之
海也亦為之行氣於三陽臟腑各因其經而受氣以益
陽明故為胃行其津液四肢不得稟水穀氣日以衰陰
道不利筋骨肌肉皆無氣以生故不用焉不用者謂不
能為之運用也由是觀之則五臟六腑四肢百骸皆稟
受於脾胃行其津液相與濡潤滋養矣後之醫者欲以
燥熱之劑以養脾胃滋土之氣不亦外乎况消渴之病

者本濕寒之陰氣極衰燥熱之陽氣太甚更服燥熱之藥則脾胃之氣竭矣叔世不分五運六氣之虛實而一概言熱為實而虛為寒彼但知心火陽熱一氣之虛實而非臟腑六氣之虛實也蓋肺本清虛則溫心本熱虛則寒肝本溫虛則清脾本濕虛則燥腎本寒虛則熱假若胃冷為虛者乃胃中陰水寒氣實甚而陽火熱氣衰虛也非胃土濕氣之本衰故當溫補胃中陽火之衰退其陰水寒氣之甚又如胃熱為實者乃胃中陽火實而

陰水虛也故當以寒藥瀉胃中之實火而養其虛水然
此皆補瀉胃中虛熱水火所乘之邪非胃為濕者之本
其餘例同法夫補瀉脾胃濕土之水氣者潤其濕者是
補濕燥其濕者是瀉濕土本濕故也凡臟腑諸氣不必
腎水獨當寒心火獨當熱要知每臟每腑諸氣和同宣
而平之可也故余嘗謂五常之道陰中有陽陽中有陰
孤陰不長獨陽不成但有一物皆備五行遞相濟養是
謂和平交互克伐是謂衰興變亂失常患害由行故水

少火多為陽實陰虛而病熱也水多火少為陰實陽虛而病寒也其為治者瀉實補虛以平為期而已矣故治消渴者補腎水陰寒之虛而瀉心火陽熱之實除腸胃燥熱之甚濟身津液之衰使道路散而不結津液生而不枯氣血利而不澁則病日已矣况消渴者本因飲食服餌失宜腸胃乾涸而氣液不得宣平或耗亂精神過違其度或因大病陰氣損而血液衰虛陽氣悍而燥熱鬱甚之所成也故濟衆云三消渴者皆由久嗜鹹物恣

食炙燂飲酒過度亦有年少服金石丸散積久石熱結于胸中下焦虛熱血氣不能制石熱燥甚於胃故渴而引飲若飲水多而小便多者名曰消渴若飲食多而不甚渴小便數而漸瘦者名曰消中若渴而飲水不絕腿消瘦而小便有脂液者名曰腎消如此三消者其燥熱一也但有微甚耳余聞世之方多一方而通治三消渴者以其善消水穀而喜渴也然叔世論消渴者多不知本其言消渴者上實熱而下虛冷上熱故煩渴多飲下

寒故小便多出本因下部腎水虛而不能制其上焦心
火故上實熱而下虛冷又曰水數一為物之本五行之
先故腎水者人之本命之元不可使之衰弱根本不堅
則枝葉不茂元氣不固則形體不榮消渴病者下部腎
水極冷若更服寒藥則元氣轉虛而下部腎水轉衰則
上焦心火亢甚而難治也但以暖藥補養元氣若下部
腎水得實而勝退上焦火則自然渴止小便如常而病
愈也若此之言正與仲景相反所以巧言似是於理實

違者也非徒今日之誤誤已久哉又如蔣氏藥證病原
中論消渴消中消腎病曰三焦五臟俱虛熱惟有膀胱
冷似冰又曰腰腎虛冷日增重又曰膀胱腎臟冷如泉
始言三焦五臟俱虛熱惟有膀胱冷似冰復言五臟亦
冷且腎臟水冷言為虛其餘熱者又皆言其虛夫陰陽
興衰安有此理且其言自不相副其失猶小至於寒熱
差殊用藥相反過莫大焉或又謂腎與膀胱屬水虛則
不能制火虛既不能制火故小便多者愈失之遠矣彼

謂水氣實者必能制火虛則不能制火故陽實陰虛而
熱燥其液小便淋而常少陰實陽虛不能制水小便利
而常多豈知消渴小便多者非謂此也何哉蓋燥熱太
甚而三焦腸胃之腠理怫鬱結滯緻密壅塞而水液不
能滲泄浸潤於外榮養百骸故腸胃之外燥熱太甚雖
復多飲于中終不能浸潤於外故渴不止小便多出者
如其多飲不能滲泄於腸胃之外故數洩也故余盡言
原病式曰皮膚之汗孔者謂泄汗之孔竅也一名氣門

者謂泄氣之門戶也一名腠理者謂氣液之隧道紋理也一名鬼門者謂幽冥之門也一名玄府者謂玄微之府也然玄府者無物不有人之腑臟皮毛肌肉筋膜骨髓爪牙至於萬物悉皆有之乃出入升降道路門戶也故經曰出入廢則神機化滅升降息則氣立孤危故非出入則無以生長壯老非升降則無以生長化收藏是知出入升降無器不有故知人之眼耳鼻舌身意神識能為用者皆由升降出入之通利也有所閉塞則不能

用也若目無所見耳無所聞鼻不聞香舌不知味筋痿骨痺爪退齒腐毛髮墮落皮膚不仁腸胃不能滲泄者悉由熱氣怫鬱玄府閉塞而致津液血脉榮衛清氣不能升降出入故也各隨鬱結微甚而有病之大小焉病在表則怫鬱腠理閉密陽氣不能散越故燥而無汗而氣液不能出矣叔世不知其然故見消渴數洩妄言為下部寒爾豈知腸胃燥熱怫鬱使之然也予之所以舉此世為消渴之證乃腸胃之外燥熱痞閉其滲泄之道

路水雖入腸胃之內不能滲泄於外故小便數出而復
渴此數句足以盡其理也試取內經凡言渴者盡明之
矣有言心肺氣厥而渴者有言肝痺而渴者有言脾熱
而渴者有言腎熱而渴者有言胃與大腸熱結而渴者
有言脾痺而渴者有言小腸痺熱而渴者有因病瘧而
渴者有因肥甘石藥而渴者有因醉飽入房而渴者有
因遠行勞倦遇大熱而渴者有因傷害胃乾而渴者有
因腎熱而渴者有因病風而渴者雖五臟之部分不同

而病之所遇各異其功燥熱一也

所謂心肺氣厥而渴者厥論曰心移熱於肺傳為膈消
注曰心熱入肺久而傳化內為膈熱消渴多飲也所謂
肝痺而渴者痺論曰肝痺者夜卧則驚多飲數小便如
脾熱而渴者痿論曰脾氣熱則胃乾而渴肌肉不仁發
為肉痿

所謂腎熱而渴者刺熱論曰腎熱病者先腰痛胷酸苦
渴數飲身熱熱論曰少陰脉貫腎絡於肺繫舌本故口

燥舌乾而渴叔世惟言腎虛不能制心火為上實熱而下虛冷以熱藥溫補腎水欲令勝退心火者未明陰陽虛實之道也夫腎水屬陰而本寒虛則為熱心火屬陽而本熱虛則為寒若腎水陰虛則心火陽實是謂陽實陰虛而上下俱熱明矣故氣厥論曰腎氣衰陽氣獨勝宣明五氣論曰腎惡燥由燥腎枯水涸藏氣發時論曰腎苦燥急食辛以潤之夫寒物屬陰能養水而瀉心熱物屬陽能養火而耗水令腎水既不勝心火則上下俱

熱奈何以熱藥養腎水欲令勝心火豈不謬哉又如胃
與大腸熱結而渴者陰陽別論二陽結謂之消注曰陽
結胃及大腸俱熱結也腸胃藏熱善消水穀又氣厥論
曰大腸移熱於胃善食而瘦脉要精微論曰痺成為消
中善食而瘦如脾痺而渴者數飲而不得中氣喘而爭
時發飧泄夫數飲而不得中其大便必不停留然則消
渴數飲而小便多者止是三焦燥熱怫鬱而氣衰也明
矣豈可以燥熱毒藥助其強陽以伐衰陰乎此真實實

虛虛之罪也夫消渴者多變聾盲瘡癰瘰癧之類皆腸胃燥熱怫鬱水液不能浸潤於周身故也或熱甚而膀胱怫鬱不能滲泄水液妄行而面上腫也如小腸瘴熱而渴者舉痛論曰熱氣留於小腸腸中痛瘴熱焦渴則便堅不得出矣注曰熱滲津液而小便堅矣如言病瘴而渴者瘴論曰陽實則外熱陰虛則內熱內外皆熱則喘而渴故欲飲冷也然陽實陰虛而為病熱法當用寒藥養陰瀉陽是謂瀉實補衰之道也如因肥甘石藥而

渴者奇病論曰有口甘者病名為何岐伯曰此五氣之所溢也病名脾痺瘴為熱也脾熱則四臟不稟故五氣上溢也先因脾熱故曰脾痺又經曰五味入口藏於胃脾為之行其精氣津液在脾故令人口甘也此肥美之所發也此人必數食甘美而多肥也肥者令人內熱甘者令人中滿故其氣上溢轉而為消渴通乎虛實論曰消痺仆擊偏枯痿厥氣滿發逆肥貴之人膏粱之疾也或言人惟胃氣為本脾胃合為表裏脾胃中州當受溫

補以調飲食今消渴者脾胃極虛益宜溫補若服寒藥
耗損脾胃本氣虛乏而難治也此言乃不明陰陽寒熱
虛實補瀉之道故妄言而無畏也豈知腹中論云帝曰
夫子數言熱中消中不可服芳草石藥石藥發癩芳草
發狂注言多飲數溲謂之熱中多食數溲謂之消中多
喜曰癩多怒曰狂芳美味也石謂英乳乃發熱之藥也
經又曰熱中消中皆富貴人也今禁膏粱是不合其心
禁芳草石藥是病不愈願聞其說岐伯曰芳草之味美

石藥之氣悍二者之氣急疾堅勁故非緩心和人不可服此二者帝曰何以然岐伯曰夫熱氣慄悍藥氣亦然所謂飲一溲二者當肺氣從水而出也其水穀之海竭矣凡見消渴便用熱藥誤人多矣故內經應言渴者皆如是豈不昭晰歟然而猶有惑者諸氣過極反勝也者是以人多誤也如陽極反似陰者是也若不明標本認似為是始終乖矣故凡見下部覺冷兩膝如水此皆心火不降狀類寒水宜加寒藥下之三五次則火降水升

寒化自退然而舉世皆同執迷至如易素二書棄如朽
壞良可悲夫故處其方必明病之標本達藥之所能通
氣之所宜而無加害者可以制其方也已所謂標本者
先病而為本後病而為標此為病之本末也標本相傳
先當救其急也又云六氣為本三陰三陽為標蓋為病
臟病最急也又云六氣為胃之本假若胃熱者胃為標
熱為本也處其方者當除胃中之熱是治其本也故六
氣乃以甚者為邪衰者為正法當瀉甚補衰以平為期

養正除邪乃天之道也為政之理補賤之義也大凡治病明知標本按法治之何必謀於衆陰陽別論曰謹熟陰陽無與衆謀標本病傳論知標知本萬舉萬當不知標本是謂妄行至真要大論曰知標知本用之不治明知逆順正行無問不知是者不足以言診適足以亂經故大要曰粗工嘻嘻以為可知言熱未已寒病復起同氣異形迷診亂經此之謂也夫標本之道要而博小而大可以言一而知百言標與本易而弗損察本與標氣

可令調明知勝復為萬民式天之道畢矣天元紀大論
曰至數極而道不惑可謂明矣所謂藥之巧能者溫涼
不同寒熱相反燥濕本異云云前已言之矣斯言氣也
至於味之巧能如酸能收甘能緩辛能散苦能堅鹹能
軟酸屬木也燥金主於散落而木反之土濕主於緩而
水勝之故能然也若能燥濕而堅火者苦也易曰燥萬
物者莫熯乎火凡物燥則堅也甘能緩急而散結甘
者土也燥能急結故緩則急散也辛能散抑散結潤燥

辛者金也金主散落金生水故也况抑結散則氣液宣
行而津液生也藏氣發時論曰腎苦燥急食辛以潤之
開腠理致津液通氣也鹹能軟堅鹹者水也水潤而柔
故勝火之堅矣此五臟之味也其為五味之本也淡也
淡胃土之味也胃土者地也地為萬物之本胃為一身
之本天元紀大論曰在地為化化生五味故五味之本
淡也以配胃土淡能滲泄利竅夫燥能急結而甘能緩
之淡為剛土極能潤燥緩其急結令氣通行而致津液

滲泄也故消渴之人其藥與食皆宜淡劑至真要大論
曰辛甘發散為陽酸苦涌泄為陰鹹味涌泄為陰淡味
滲泄為陽六者或散或收或緩或急或燥或潤或堅或
更所以利而行之調其氣也本草云藥有三品上品為
君主養命小毒以應天中品為臣主養性常毒以應人
下品為佐使主治病大毒以應地不在三品者氣毒之
物也凡此君臣佐使者所以明藥之善惡也處方之道
主治病者為君佐君者為臣應臣之用者為佐使適其

病之所根有君臣佐使奇偶小大之制明其歲政君臣
脉位而有逆順反正主療之方隨病所宜以施用其治
法多端能備所用者良工也寒者熱之熱者寒之溫者
清之清者溫之結者散之散者收之微者逆而制之甚
者從而去之燥者潤之濕者燥之堅者熨之熨者堅之
急者緩之客者除之留者却之勞者溫之逸者行之驚
者平之衰者補之甚者瀉之吐者下之摩之益之薄之
劫之開之發之灸之制之適足為用各安其氣必清必

淨而病氣衰去臟腑和平歸其所宗此治之大體也陰陽應象論曰治不法天之紀不明地之理則災害至矣又六節藏象論曰不知年之所加氣之所衰不可以為功也今集諸經驗方附于篇末

神白散 治真陰素被損虛多服金石等藥或嗜炙燻

鹹物遂成消渴

桂府滑石

六兩

甘草

一兩
生用

右為細末每服三錢溫水調下或大渴欲飲冷者新

汲水尤妙

猪肚丸 治消渴消中

猪肚

一枚

黃連

五兩

括蕪

四兩

麥門冬

四兩 去心

知

母

四兩如無以茯苓代之

右四味為細末納猪肚中線縫安置甌中蒸極爛熟就熱於木臼中搗可丸如硬少加蜜丸如梧桐子大每服三十九漸加至四五十丸渴則服之如無木臼以沙盆中用木杵研亦可以爛為妙矣

葛根丸 治消渴消腎

葛根

三兩

括萋

三兩

鈆丹

二兩

附子

一兩 炮去皮臍

右四味搗羅為細末煉蜜為丸桐子大每服十九日

進三服治日飲碩水者春夏去附子

胡粉散 治大渴百方療不瘥者亦治消腎

鈆丹

胡粉

各半兩

括萋

一兩半

甘草

二兩半炙

澤瀉 石膏 赤石脂 白石脂 各半兩

右八味為細末水服方寸匕日二服壯者一匕半一

年病一日愈二年病二日愈渴甚者二服腹痛者減之如丸服亦妙每服十九多則腹痛也

三黃丸 主治男子婦人五勞七傷消渴不生肌肉婦人帶下手足發寒熱者

春三月

黃芩

兩四

大黃

兩二

黃連

兩四

夏三月

黃芩

兩六

大黃

兩二

黃連

兩四

秋三月

黃芩

兩六

大黃

兩二

黃連

兩三

冬三月

黃芩

兩三

大黃

兩五

黃連

兩二

右三味隨時加減搗為細末煉蜜和丸如大豆大每服五丸日三服不去者加七丸服一月病愈嘗試有驗矣

人參白朮散

治胃膈痺熱煩悶不欲食或痺成為消中善食而瘦或燥鬱甚而消渴多飲而數小便或熱病或恣酒色誤服熱藥者致脾胃真陰血液損虛肝心相搏風熱燥甚三焦腸胃燥熱怫鬱而水液不能宣行

則周身不能潤濕故瘦瘁黃黑而燥熱消渴雖多
飲而水液終不能浸潤於腸胃之外渴不止而便
注為小便多也叔世流俗不明乎此妄為下焦虛
冷誤死多矣又如周身風熱燥鬱或為目癩癰疽
瘡瘍上為喘嗽下為痿痺或停積而濕熱內甚不
能傳化者變水腫腹脹也凡多飲數溲為消渴多食
數溲為消中肌肉消瘦小便有脂液者為消腎此
世之所傳三消病也雖無所不載以內經考之但

燥熱之微甚者也此藥兼療一切陽實陰虛風熱
燥鬱頭目昏眩風中偏枯酒過積毒一切腸胃澀
滯壅塞瘡癬痿痺并傷寒雜病煩渴氣液不得宣
通并宜服之

人參 白朮 當歸 芍藥 大黃 山梔子

澤瀉 已上各半兩 連翹 芫荽根 乾葛

茯苓 已上各一兩 官桂 木香 藿香 各

一分 寒水石_{二兩} 甘草_{三兩} 石膏_{四兩} 滑石

盆硝 各半兩

右為麤末每服五錢水一盞生薑三片同煎至半盞
絞汁入蜜少許溫服漸加十餘錢無時日三服或
得臟腑䟽利亦不妨取効更妙後却常服之或兼
服消痞丸似覺腸胃結滯或濕熱內甚自利者去

大黃芒硝

人參散

治身熱頭痛或積熱黃瘦或發熱惡寒畜熱寒戰或

膈痰嘔吐煩熱煩渴或燥濕瀉痢或目疾口瘡或
咽喉腫痛或中風昏眩或蒸熱虛汗肺痿勞嗽一切
邪熱變化真陰損虛並宜服之

石膏

一兩

寒水石

二兩

滑石

四兩

甘草

二兩

人參

半兩

右為細末每服二錢溫水調下或冷水亦得

三消之論劉河間之所作也因麻徵君寫汴梁暇日訪
先生後裔或舉教醫學者即其人矣徵君親詣其家求

先生平昔所著遺書乃出三消論氣宜病機三書未傳于世者又多不全止取三消論於卷首增寫六位藏象二圖其餘未遑潤色即付友人穆子昭子昭乃河間門人穆大黃之後也時覓官於京師方且告困徵君欲因是而惠之由是余從子昭授得一本後罹兵火遂失其傳偶於鄉人霍司承君祥處復見其文然傳寫甚誤但依倣而錄之以待後之學者詳為刊正云時甲辰年冬至日綿溪野老書續方栢亭東久亭寺僧悟大師傳經

驗方

治飲水百盃尚猶未足小便如油或如杏色服此藥
三五日小便大出毒歸于下十日永除根本此方
令子和辨過云是重劑可用悟公師親驗

水銀

四錢

錫

二錢用水銀研成砂子

牡蠣

一兩

蜜陀僧

一兩

知母

一兩

紫花苦參

一兩

貝母

一兩

黃丹

半兩

朮

萋根

半兩

右為細末男子用不生兒猪肚一箇內藥婦人用獾

猪肚一箇麻線縫之新瓦一合繩繫一兩遭米一
升更用菰萋根末半斤却於新水煮熟取出放冷
用砂盆內研爛就和為丸如猪肚丸法用之

儒門事親卷十三

欽定四庫全書

儒門事親卷十四

金 張從正 撰

扁鵲華陀察聲色定死生訣要

病人五臟已奪神明不守聲嘶者死

病人循衣縫謔語者不可治

病人陰陽俱絕掣衣撮空妄言者死

病人妄語錯亂及不能言者不治熱病者可治

病人陰陽俱絕失音不能言者三日半死

病人兩目眦有黃色起者其病方愈

病人面黃目青者至期而死

重出在下文

病人面黃目赤不死赤如衄血者死

病人面黃目白者不死白如枯骨者死

病人面黃目黑者不死黑如苔死

病人面黑目青者不死

病人面目俱黃者不死

病人面青目白者死

病人面黑目白者不死

病人面赤目青者六日死

病人面黃目青者九日必死是謂亂經飲酒當

風邪入胃經膽氣妄泄目則為青雖天救亦

不可生

病人面赤目白者十日死憂恚思心氣內索面

色反好急棺槨

病人面白目黑者死此謂榮華已去血脉空索

病人面黑目白八日死腎氣內傷病因留損

病人面青目白五日死

病人着床心痛短氣脾氣內竭後百日復愈能

起傍徨因坐於地其上倚床能治此者也

病人耳目鼻口有黑色起入于口者必死

病人目無精光若土色不受飲食者四日死

病人目精光及牙齒黑色者不治

病人耳目及顴頰赤者死在五日中午

病人黑色出于額上髮際直鼻脊兩顴上者亦

死在五日中午

病人黑色出天中下至上顴上者死

病人及健人黑色若白色起入目及鼻口死在

三日中午

病人及健人面忽如馬肝色望之如青近之如

黑者死

病人面黑直視惡風者死

病人面黑唇青者死

病人面青唇黑者死

病人面黑兩脇下滿不能自轉反者死

病人目不回直視者一日死

病人頭目久痛卒視無所見者死

病人陰結陽絕目睛脫恍惚者死

病人陰陽竭絕目眶陷者死

病人眉系傾者七日死

病人口如魚口不能復閉而氣出多不反者死
病人卧遺尿不覺者死

病人尸臭者不可治

肝病皮黑肺之日庚辛死

心病目黑腎之日壬癸死

脾病唇青肝之日甲乙死

肺病頰赤目腫心之日丙丁死

腎病面腫唇黃脾之日戊巳死

青欲如蒼壁之澤不欲如藍

赤欲如帛裏朱不欲如赭

白欲如鵝羽不欲如枯骨

黑欲如黑漆不欲如炭

黃欲如羅裏雄黃不欲如土

目赤色者病在心白在肺黑在腎黃在脾青在肝黃色
不可名者病在胸中

診目病赤脉從上下者太陽病也從下上者陽明病也
從外入內者少陽病也

診寒熱瘰癧目中有赤脉從上下至瞳子見一脉一歲
死見一脉半一歲半死見二脉二歲死見二脉半二歲
半死見三脉三歲死

診牙齒痛按其陽明之脉來太過者獨熱在右右熱熱
在左左熱熱在上上熱熱在下下熱

診血者脉多赤多熱多青多痛多黑多黃多痺多赤多

黑多青皆見者寒熱身痛面色微黃齒垢黃爪甲上黃疸也安卧少黃赤脉小而濇者不嗜食

診百病死生訣第七

診傷寒熱盛脉浮大者生沉小者死傷寒已得汗脉沉小者生浮大者死

溫病三四日已下不得汗脉大疾者生脉細小難得者死不治

溫病穰穰大熱其脉細小者死千金穰穰作特行

溫病下利腹中痛甚者死不治

溫病汗不出出不至足者死厥逆汗出脉堅強急者生
虛緩者死

溫病二三日身體熱腹滿頭痛食如故脉直而疾者八
日死四五日頭痛腹痛而吐脉來細強十二日死八九
日頭不疼身不痛目不變色不變而反利脉來喋喋按
之不彈手時時心下堅十七日死

熱病七八日脉不軟一作喘不散一作數者當有瘡瘡

後三日溫汗不出者死

熱病七八日其脈微細小便不利加暴口燥脈代舌焦
乾黑者死

熱病未得汗脈盛躁疾得汗者生不得汗者難瘥

熱病已得汗脈靜安者生脈躁者難治

熱病已得汗大熱不去者亦死

熱病已得汗熱未去脈微躁者慎不得刺治

熱病發熱熱甚者其脈陰陽皆竭慎勿刺不汗出必下

利

診人被風不仁痿躄其脉虛者生堅急疾者死

診癩病虛則可治實則死

診癩病脉實堅者生脉沉細者死

又癩疾脉得大滑者久而自已其脉沉小急實不可療小堅急者亦不可療也

診頭痛目痛久視無所見者死

診人心腹積聚其脉堅強急者生虛弱者死又實強者

生沉者死其脉大腹大脹四肢逆冷其人脉形長者
死腹脹滿便血脉大時絕極下血小疾者死

腸澼便血身熱則死寒則生

腸澼下白沫脉沉則生浮則死

腸澼下膿血脉懸絕則死滑大則生

腸澼之屬身熱脉不懸絕滑大者生懸濇者死以臟期之

腸澼下膿血脉沉小留連者生數疾且大有熱者死

腸澼筋攣其脉小細安靜者生浮大緊者死

洞泄食不化不得留下膿血脉微小連者緊急者死

洩注脉緩時小結者生浮大數者死

蚕蝕陰注其脉虛小者生緊急者死

欬嗽脉沉緊者死浮直者浮軟者生小沉伏匿者死

欬嗽羸瘦脉形堅大者死

欬脫形發熱脉小堅急者死肌瘦下脫形熱不去者死
欬而嘔腹脹且洩其脉弦急欲絕者死

吐血衄血脉滑小弱者生實大者死

汗若衄其脉小滑者生大躁者死

吐血脉紧强者死滑者生

吐血而欬上氣其脉數有熱不得卧者死

上氣脉數者死謂損形故也

上氣喘息低昂其脉滑手足溫者生脉澁四肢寒者死

上氣面浮腫肩息其脉大不可治加利必死

上氣注液其脉虛寧伏匿者生堅强者死

寒氣上攻脉實而順滑者生實而逆滑者死

太素云寒氣在上脉

滿實何如曰實而滑則生實而逆則死矣其形盡滿何如曰舉形盡滿者脉急大堅尺滿而不應知是者順則生逆則死何謂順則生逆則死所謂順者手足溫也逆者手足寒也

病癰脉實大病久可治脉弦小堅急病久不可治

消渴脉數大者生細小浮短者死

消渴脉沉小者生實堅大者死

水病脉洪大者可治微細不可治

水病脹閉其脉浮大軟者生沉細虛小者死

水病腹大如鼓脉實者生虛者死

卒中惡咯血數升脉沉數細者死浮大疾快者生

卒中惡腹大四肢滿脉大而緩者生緊大而浮者死緊

細而微亦生

瘡腰脊彊急痠癱皆不可治

寒熱痠癱其脉代絕者死

金瘡血出太多其脉虛細者生數實大者死

金瘡出血脉沉小者生浮大者死

斫瘡出血一二升脉來大二十日死

斫刺俱有病多少血出不自止者其脉來大者七日死
滑細者生

從頭頓仆內有血腹脹滿其脉堅彊者生小弱者死

人為百藥所中傷脉溢而疾者生微細者死洪大而遲
者生 千金遲作速

人病甚而脉不調者難治脉洪大者易瘥

人內外俱虛身體冷而汗出微嘔而煩擾手足厥逆體
不得安靜者死脉實滿手足寒頭熱春秋生冬夏死

老人脉微陽羸陰强者生脉大而加加者死陰弱陽彊
脉至而代期月而死

尺脉濇而堅為血實氣虛也其發病腹痛逆滿氣上行
此為婦人胞中絕傷有惡血久成結瘕得病以冬時
忝當赤而死

尺脉細而微者血氣俱不足細而來有力者是穀氣不
充病得節輒動棗葉生而死此病秋時得之左手寸
口脉偏動乍大乍小不齊從寸至關關至尺三部之

位其脈動各異不同其人病仲夏得之此脈桃花落而死

右手寸口脈偏沉伏乍小乍大朝浮大而暮沉伏浮大即太過上出魚際沉伏即下不止關中往來無常時復來者榆華枯而死

右手尺部脈三十動一止有須臾還二十動止乍動乍踈連連相因因不與息數相應其人雖食穀猶不愈繁草生而死

右手尺部脈四十動而一止止而復來來逆如循張弓
弦絀絀然如兩人共一索至立冬死

病機

諸風掉眩皆屬於肝甲乙木也木鬱達之
諸寒收引皆屬於腎壬癸水也水鬱泄之
諸氣臏鬱皆屬於肺庚辛金也金鬱折之
諸濕腫滿皆屬於脾戊己土也土鬱奪之
諸痛痺瘡瘍皆屬於心丙丁火也火鬱發之

諸熱瞽瘈皆屬於火

諸厥固泄皆屬下

下謂下焦肝腎氣也夫守司於下腎之氣也門戶東要肝之氣也故厥固泄

皆屬下也厥謂氣逆也固謂禁固也滿氣逆上行反謂固不禁出入無度燥濕不恒皆由下焦主守也

諸痿喘嘔皆屬於上上謂上焦心肺氣也炎熱薄爍承

熱分化肺之氣也熱鬱化上故病屬上焦

諸禁鼓慄如喪神守皆屬於火熱之內作

諸頸項強皆屬於濕太陽傷濕

諸逆衝上皆屬於火炎上之性用也

諸脹腹大皆屬於熱熱鬱於內肺脹所生

諸躁狂越皆屬於火熱盛於胃及四末也

諸暴強直皆屬於風陽內鬱而陰行於外

諸病有聲鼓之如鼓皆屬於熱

諸熱肘腫疼酸驚駭皆屬於火

諸轉反戾水液渾濁皆屬於熱反戾筋轉也水液小便也

諸病水液澄徹清冷皆屬寒上下所出及吐出溺出也

諸嘔吐酸暴注下迫皆屬於熱

故大要曰謹守病機各司其屬有者求之無者
求之盛者責之虛者責之必先五勝踈其血氣
令其調達而致和平此之謂也五勝謂五行更
勝也

標本運氣歌

少陽從本為相火太陰從本濕土坐厥陰從中火是家
陽明從中濕是我太陽少陰標本從陰陽二氣相包裹

風從火斷汗之宜燥與濕兼下之可萬病能將火濕分
徹開軒岐無縫鑰

辨十二經水火分治法

膽與三焦尋火治肝和包絡都無異脾肺嘗將濕處求
胃與大腸同濕治惡寒表熱小膀胱溫惡熱表寒心腎熾
十二經最端的四經屬火四經濕四經有熱有寒時攻
裏解表細消息濕同寒火同熱寒熱到頭無兩說六分
分來半分寒寒熱中停真浪舌休治風休治燥治得火

時風燥了當解表時莫攻裏當攻裏時莫解表表裏如
或兩可攻後先內外分多少敢謝軒岐萬世恩爭奈醯
雞笑天小

治病

不讀本草焉知藥性專泥藥性決不識病假饒識病未
必得法識病得法工中之甲

六陳

藥有六味陳久為良狼茱半橘枳實麻黃

十八反

本草名言十八反半萋貝蕪及攻烏藻戟遂芫俱戰草
諸參辛芍叛藜蘆

運氣歌

病如不是當年氣看與何年運氣同只向某年求治法
方知都在至真中

五不及

坎一丁三土五中一七癸九是災宮勝復都來十一位

誰知臟腑與宮同

斷病人生死

靈樞經云人有兩死而無兩生陽氣前絕陰氣後竭其人死身色必青陰氣前絕陽氣後竭其人死身色必赤故陰竭則身青而冷陽竭則身赤而溫

四因

夫病生之類其有四焉一者始因氣動而內有所成二者始因氣動而外有所成三者不因氣動而病生於內

四者不因氣動而病生於外

因氣動而內成者謂積聚癥瘕瘤氣癭起結核癩癧之類是也

不因氣動而病生於內者謂流飲癖食飢飽勞損宿食霍亂悲恐喜怒想慕憂結之類

不因氣動而病生於外者謂瘴氣賊魅蟲蛇蠱毒蜚食鬼擊衝薄墜墮風寒暑濕斫射刺割撻扑之類也如此四類有獨治內而愈者有兼治內而愈者有獨治外而

愈者有兼治外而愈者有先治內後治外而愈者有先
治外後治內而愈者有須解毒而攻擊者有須無毒而
調引者凡此之類方法所施或重或輕或緩或急或收
或散或潤或燥或奠或堅方士之用見解不同各擅已
心好丹非素故復問之

五苦六辛

五苦六辛從來無解蓋史家闕其疑也一日麻徵君以
此質疑于張先生先生亦無所應行十五里忽然有所

悟欣然迴告于麻徵君以為五苦者五臟為裏屬陰宜用苦劑謂苦涌泄為陰六辛者六腑為表屬陽宜用辛劑謂辛甘發散為陽此其義也徵君大服其識鑒深遠鑿昔人不傳之妙故曰知其要者一言而終不知其要者流散無窮

儒門事親卷十四

欽定四庫全書

子部
儒門事親卷十五

詳校官太醫院吏目臣家桂

編修臣倉聖脈覆勘

總校官原任中允臣王燕緒

校對官中書臣呂雲棟

謄錄監生臣張炳

欽定四庫全書

儒門事親卷十五

金 張從正 撰

瘡瘍癰腫第一

治螻蛄瘡

良薑 白芨 瀝青 已上各等分

右為細末嚼芝麻水同熬為膏入冷水共定用緋絹
片火熨斗作膏藥貼瘡上

又方千年石灰 茜根燒灰

右為細末用水調雞翎塗上

水沉金絲膏 貼一切惡瘡

瀝青 白膠 已上各一兩 春秋宜用油

夏宜油鵝二錢半 冬宜用油蠆四錢

右件鎔開油蠆下瀝青白膠用槐枝攪勻綿子濾過
入冷水中扯一千餘遍如瘡透了喫數丸作劑於
瘡口填者亦妙攤紙上貼勿令火炙

乳香散 治下疳

乳香 沒藥 輕粉 黃丹 龍骨 烏魚骨

黃連 黃芩 銅碌 已上各等分 麝香少許

右為細末先以溫漿水洗過貼疔瘡上

治蛇傷方

右用蒲公英科根作泥貼于傷處用白麵膏藥貼之

紫金丹 治疔瘡

白礬四兩 黃丹二兩

右用銀石器內鎔礬作汁下丹使銀釵子攪之令紫色成也用文武火無令太過不及如有瘡先以週圍挑破上藥用唾津塗上數度着無令瘡乾其瘡潰動取疔出也兼瘡顏色紅赤為効如藥末成就再杵碎炒令紫色

治疔瘡

生蜜與隔年葱一處研成膏

右先將瘡週迴用竹鍼刺破然後用瘡藥於瘡上攤

之用緋絹蓋覆如人行二十里覺疔出然後以熱醋湯洗之

千金托裏散 治一切發背疔瘡

連翹

一兩
二錢

黃耆

一兩
半

厚朴

二兩

川芎

一兩

防

風

二兩

桔梗

二兩

白芷

一兩

芍藥

一兩

官桂

一兩

木香

三錢

乳香

三錢
半

當歸

半兩

沒藥

三錢

甘草

一兩

人參

半兩

右為細末每服三錢用酒一椀盛煎三沸和滓溫服

膏子貼之

二聖散 治諸瘡腫

黃丹

二兩

白礬

二兩
飛

右為細末每服乾摻瘡口上後用保生錠子捏作餅

子貼之

保生錠子

芭荳

四十九箇另研
文武火燒熱

金脚信

二錢

雄黃

三錢

輕

粉

半匣

硃砂

二錢

麝香

二錢

右件為末用黃蠟一兩半化開將藥和成錠子冷水
浸少時取出旋捏作餅子如錢眼大將瘡頭撥破
每用貼一餅子次用神聖膏藥封貼然後服托裏
散若瘡氣透裏危者服破棺散用神聖膏

神聖膏藥 貼治一切惡瘡

當歸

半兩

沒藥

三錢

白芨

二錢

乳香

三錢

藁本

半兩

琥珀

二錢

黃丹

四兩

木鱉子

五箇

膽礬

一錢

粉霜

一錢

黃蠟

二兩

白膠

三兩

芭荳

二十五箇

去皮

槐柳枝

一百二十條
各長一把

清油

一斤

右件一處先將槐柳枝下油內煮焦取出次後下其餘藥物煮得極焦亦撈出却將油澄清再熬成膏子用緋絹上攤

破棺丹

大黃

一兩半

甘草

二兩

荆三稜

一兩半

山梔子

二兩

半

牽牛末

二兩

右為細末煉蜜為丸如彈子大每服半丸食後酒半

盞研化服之忌冷水

三聖散 治疔瘡疔瘡搭手背疽等瘡

葱白一斤 馬莧一斤 石灰一斤

右三味濕搗為團陰乾為細末貼瘡如有死肉者宜

先用潰死肉藥

潰死肉藥方

炊飯尖

半兩各三等

一等半兩入芭荳二箇 一等

半兩

入芭荳三箇

一等半兩入芭荳五箇

各搥作白錠子

右先用二芭荳納瘡如不潰再用納三芭荳又不潰
用五芭荳者更用丹砂炒紅色摻瘡口追出清水
其惡肉未盡至追出赤水是惡肉盡更用三聖散
貼上用膏藥傅之

治疔瘡久不愈者

以川烏頭黃蘗各等分為末用唾津調塗紙上貼
之

治一切惡瘡方

以天茄葉貼之或為細末貼之亦妙

又方 用臍月人中白燒灰油調塗瘡疥上

又方 以瓦松不以多少陰乾為末先用槐枝蔥白湯洗之過摻之立効灸瘡久不斂者更妙

又方 以蒲公英搗之貼一切惡瘡諸刺

替針丸 治一切惡瘡

川烏二錢 草烏二錢 五靈脂二錢 輕粉一分 粉霜

一分

又方

加斑貓二十箇

去足翅用

芭荳二十箇

去皮用

右將三件為末研令勻次入輕粉粉霜研勻又入斑

貓芭荳以水調糊為錠子

如作散是謂針頭散

懸萋散

治發背惡瘡

懸萋一箇

大黃

一兩

金銀花

一兩

當歸

半兩

皂

角刺

一兩

右剉碎用酒一椀煎至七分去滓溫服如有頭者加

黍粘子

治附骨癰及一切惡瘡

當歸

兩半

甘草

兩一

山梔子

十二箇

木鱉子

一箇

右為細末每服三五錢冷酒調服之

治諸惡瘡

白殭蚕

直者

大黃二味各等分

右為細末生薑自然汁與蜜同和為劑丸如彈子大

每服一九細嚼

治惡瘡死肉鉷子

芭荳一錢去皮油

五靈脂半兩

黃丹二錢飛

加枯白礬一錢

右為細末以糊和丸鋌子入瘡內用之

當歸活血散治瘡瘍未發出內痛不可忍及婦人產前

後腹痛

當歸二錢 沒藥一錢半

乳香半錢

白芍藥三錢

瘡

瘍者加人參木香婦人加赤芍藥

右為細末每服一錢水一中盞煎至七分和滓溫服

日二服婦人酒煎瘡既發不須用

薰惡瘡方

紫花地丁一名米布代收

右取根曬乾用四箇半頭塼壘成爐子燒着地丁用
絡埴塼一枚蓋了使令塼眼內煙出薰惡瘡出黃
水自愈

治蛇瘡

用蒲公英科根作泥貼于傷處用白膏藥封之

接骨散 并治惡瘡

金頭蜈蚣一箇

金色自然銅

半兩燒紅醋碎研為細末用之

乳香

二錢為細末用之

銅錢

重半兩者取三文或五文燒紅醋碎研細

金絲水蛭

一錢半每箇作三截瓦上溲去氣道為度

沒藥

三錢研細

右為細末如瘡腫處津調半錢塗立止痛如見得出

膿先用麤藥末少許小油少半匙同打勻再入少

半匙再打勻又入前藥接骨散半錢再都用銀釵

子打成膏子用雞翎掃在瘡腫處立止痛天明一

宿自破便効如打折骨頭并損傷可用前項接骨散半錢加馬兜苓末半錢同好酒一大盞熱調連滓溫服如骨折損立接定不疼如不折了喫了藥立便止住疼痛此方屢經効驗不可具述服藥觀可以食前服食後服又外用接骨藥

陳爛麻根

兩把羊耳
朵一對

亂絲

一握多
者更妙

右取肥松節劈碎約量多少先放三兩根於新瓦上都於上外三味在上燒着存性就研為末如生再

燒研為度後入五靈脂或半兩如疼入好乳香少許和藥如茶褐色為度用布條子約纏一遭先攤小黃米粥勻上撒上藥末勻纏定折處上又用軟帛三五重上又竹箒子纏勒得緊慢得中初三日換上一次再後五日換一次又七日再換上一次無有不接者

赤龍散 消散一切腫毒

野葡萄根紅者去麤皮為末新水調塗腫上頻掃

新水

便癰方

本名血疔

牡蠣

大黃

甘草

已上各半兩

懸菴

一箇

右酒浸露一宿服之以利為度

又方 冬葵子為末酒調下三兩服

又方 皂角不蛀者燒過陰乾為末酒調服立効皂角

子七箇水服之亦効

又方 胡桃七箇燒過陰乾研為末酒調服之不過三

服

又方 生蜜米粉調服休喫飯利小便為度

治瘡無頭者 蛇退皮於腫處貼之

又方 皂角刺燒灰陰乾

右為末每服三錢酒調嚼葵菜子三五箇前藥送下

生肌歛瘡藥

白薇

定粉

各等分

黃丹

少許

右同為細末洗淨瘡口乾貼之

治諸瘡水度腫者 生白礬末水調塗之自消

接骨藥

銅錢

半兩醋焦
燒研為末

木香

一錢

自然銅

一錢

麝香

少許

右為極細末如在上食後每服三匙頭嚼丁香一枚
乳香一粒無灰酒一小盞在下食前如不折其藥
反出服罷其痛不可當勿疑待一日如骨未接再
服如前老者十餘日少者不過五七日

萬聖神應丹出箭頭

葇蓉科

一名天仙子取着中一科
根本枝葉花實全者好

右於端午日前一日持不語尋見葇蓉科言道先生
你却在這裏那道罷用柴灰自東南為頭圍了用
木楔子掘取了根週迴土次日端午日未出時依
前持不語用鑊口一鑊取出土用淨水洗了不令
雞犬婦人見於淨室中以石臼搗為泥丸如彈子
大黃丹為衣以紙袋封了懸於高處陰乾如有人
着箭不能出者用緋絹盛此藥訖放臍中用綿裹

肚繫了先用象牙末於瘡口上貼了後用前藥如
瘡口生合用刀子利開貼之

治凍瘡

臘月雀腦子燒灰研細小油調塗凍瘡口上

又方以正黃藥為細末用乳汁調塗瘡口上

又方山藥少許生於新瓦上磨為泥塗瘡口上

治手足裂

白芨不以多少為末水調塗裂處

治面上瘡

用鐵子底黑煤於小油中以匙打成膏子攤在紙上瘡上貼之

治金瘡血不止

白薇末貼之立止

善應膏藥

黃丹

斤二

南乳香

研別

沒藥

研別

當歸

木鱉子

生用

白薇

生用

白礬

生用

官桂

三寸

杏仁生

白芷

已上各一兩

新柳枝

各長一寸

右除黃丹乳末等外八件用芝麻油五斤浸一宿用

鐵鍋內煎令黃色藥不用次入黃丹鍋內柳條攪
令黃色方可掇下用柳枝攪出大煙入乳沒勻令
冷傾在磁盆內候藥硬用刀子切作塊子油紙封
裏

接骨丹

五靈脂

一兩

茴香

一錢

右二味為細末另研乳香為細末於極痛處摻上用
小黃米粥塗了後用二味藥末摻於上再用帛子
裏了用木片子纏了少壯人二日効老者五六日
効

治癬如聖丸

黃蘗 黃芩 黃連 防風 已上各半兩

白殭蚕 一兩 全蝎 三分 輕粉 半錢

右為細末羊蹄根汁浸蒸餅為丸如梧桐子大每服

二三十丸嚼羊蹄根汁送下隨病人上下分食前
後又羊蹄汁塗癬

治小兒癬雜瘡

白膠香 黃蘗 輕粉

右為細末羊骨髓調塗癬上

治癩癧方

斑猫去頭翅足

赤小荳

白殭蚕

苦丁香

白丁香 磨刀泥

右各等分為細末十歲已上服一錢二十已上服二錢五更用新汲水一盞調下比至辰時見効女人小便見赤白色三兩次男子於大便中見赤白色為効當日服白粘粥不得喫別物大忌油膩患三四年者只一服七八年者再一服

玉餅子 治療癰一切惡瘡軟癬

右用白膠一兩磁器內鎔開去滓再於磁開後以草麻子六十四箇作泥入膠內攪勻入小油半匙頭

柱點水中試硬軟添減膠油如得所量瘡大小以
緋帛攤膏藥貼之一膏藥可治三五癩

又方治療癩

小龍肚腸

一條
炮乾

鱉殼裙襴

炮

川練子

五箇

牡蠣

大黃

牛旁子

燒存
性

皂角子

五十
箇

右為細末蒸餅為丸如菜豈大每服十五丸食後艾

湯下日三服

又方將臘月猫糞用新瓦兩箇合在內外用鹽泥固

濟燒成灰以小油調塗瘡口上

又方取小左盤龍不以多少為末陳米飯搜和得所
丸如梧桐子大每服三五丸却用陳米湯送下

治眉煉頭瘡

小麥不以多少燒冷黑色存性為末以小油調塗
瘡上

治小兒疥瘡

羊糞熨湯洗去加用屋懸煤炒羅為末以小油塗

瘡上

聖靈丹 治打撲胸損痛不可忍者

乳香

三錢
另研

烏梅

五箇去核細
切焙乾為末

白蒿苳子

二兩
八錢

炒黃鶻
為末

白米

一搵別
研細末

右再入乳鉢內研數百下煉蜜為丸如粟大細嚼熟湯下病在上食後在下食前

出曆方

右用蕎麥措一擔不爛者燒灰存性入石灰半斤同

灰一齊過令火減然後以熱水霖灰窩淋下灰水
用鐵器內煮以潦起攪成膏子於罨上點自出或
先以草莖刺破亦可

又方桑柴灰石灰淋汁熬成膏草莖刺破點以新水
沃之忌油膩等物

燒湯火方

多年廟上蚰與走獸為末小油調塗燒湯火瘡立
効

又方生地黃汁入小油螞同熬成膏磁器內盛用雞
翅掃燙處

又方培上青苔燒灰小油調塗燒燙處

治燒燙方

生地黃旋取新者爛搗取自然汁入小油黃螞少
許銀石器中熬成膏子用雞翎掃瘡上

又方血餘灰用臘猪脂調塗

又方寒水石燒過為細末水調塗之

枯瘤方

砒 硃砂 黃丹 雄黃 粉霜 輕粉

已上各等一錢

斑猫

二十箇
生用

朱砂

一錢

乳香

三錢

沒藥

一錢

同研為末粥糊為丸捏作碁子樣爆乾先灸破瘤頂
三炷為則上以瘡藥餅蓋上用黃蘗末以水調貼
之數日自然乾枯落下

又方以銅碌為末草刺破瘤摻在上以膏藥塗之

治頭面生瘤子用蛛絲勒瘤子根三二日自然退落

乳香散 貼杖瘡腫痛

大黃 黃連 黃蘗 黃芩 已上各三錢

乳香

另研

沒藥

另研

已上各一錢

腦子

少許

右四味為末後入三味冷水調勻攤於緋絹上貼杖

瘡上

治疔瘡

馬明退燒灰

三錢

輕粉

少許

乳香

少許

右研為細末先以溫漿水洗淨乾摻之

治疔瘡久不愈者

海浮石

燒紅醋
淬數次

金銀花

右海石二停金銀花一停同為細末每服二錢半如

簽茶一般日用二服瘡在上食後在下食前服如

病一年服藥半年則愈

瀉肺湯 治肺癰喘急坐卧不安

桑白皮

剉燒

甜葶藶

隔紙焙
各一兩

右二味麤末每服三錢水一盞煎至六分去滓食後
溫服以利為度

桔梗湯 治肺癰吐膿

桔梗

剉炒一兩半

甘草

炙剉半兩

右為麤末每服六七錢水二盞煎至半盞去滓空心

服須臾吐膿立愈

黃蘗散 治鵬窠微腰等瘡

黃蘗 白芨 白朮 已上各等分 黃丹

少許

右為細末凉水調塗

口齒咽喉第二

地龍散 治牙痛

地龍

去土

玄胡索

葷撥

已上各等分

右為細末每用一字用綿子裹隨左右痛於耳內塞之

牙宣藥

葷撥

胡椒

良薑

乳香

別研

麝香

細辛

青鹽 雄黃 已上各等分

右為細末先以溫漿水刷淨後用藥末於痛處擦追
出頑涎休吐了嗽數十次痛立止忌油膩一二日

仙人散

刷牙

地骨皮

二兩酒
浸一宿

青鹽

一兩

黍粘子

一兩
半炒

細辛

一兩
酒浸

右為細末入麝香少許每用一字臨卧擦牙茶酒嗽

良久吐出

又方 石膏 細辛 柳根 已上各等分
右為末擦之

治牙疳

米二停 鹽一停 盆減 麝香少許 白礬
右相合水拌勻紙包裹燒黑焦為末貼瘡上立止

治牙痛

口噙冰水一口用大黃末紙撚隨左右痛處鼻內
嚙之立止

又方

韶腦錢二 好朱砂錢一

右為末每用少許擦痛處

又方 好紅苴錢二 花減少許

右為末隨牙痛處左右鼻內嚙之

又方 華細莘去苗 白茯苓去皮 川升麻 華撥

青鹽 明石膏 川芎 不蛀皂角去皮弦酥 炙黃色

已上各等分

右為細末早晚刷牙溫水嗽之牙痛處更上少許

又方

以芭荳去皮用針刺於燈焰上灸令煙出薰牙痛

處薰三五上

又方 高良薑一塊 全蝎一隻

右為細末先用酸漿水嗽牙次用藥末擦之流下涎

水即愈

又方 治牙疼

花減填牙坑痛立止

又方 枯白礬熱水嗽之

治走馬咽痺

右用芭荳去皮以綿子微裹隨左右塞於鼻中立透
如左右俱有者用二枚

又方

用生白礬研細塗於綿針上按於喉中立破綿
針用榆條上用綿纏作橐大是也

又一法如左右喉痺於頂上分左右頭髮用手挽拔之剝然有聲立効此法年幼時常見鄭六嫂救人甚多不得其訣近與子正話及方得其傳

又一法以馬勃吹咽喉中立止

治喉痺

大黃 朴硝 白殭蚕

右件同為細末水煎量虛實用以利為度

口瘡方

白礬

一兩飛
至半兩

黃丹

一兩炒紅色
再炒紫色為度

右二味為細末摻瘡上立愈

目疾證第三

治倒睫拳毛

將川山甲以竹箒子刮去肉用羊腰窩脂去皮膜
仍將川山甲於炭上炙令黃色用脂擦去山甲上
如此數遍令酥為末隨左右眼噲水鼻內噓一字
一月餘見効

又方

木鱉子

三箇
乾炒

木賊

一百二
十節

地龍

二條
去土

赤龍爪

一百二十箇
則勾刺針也

右為細末摘去倒睫每日以紙撚蘸藥啗之一日三

五次

又方

穿山甲

炮

地龍

去
皮

蟬殼

五倍子

已上各等分

右為細末如用藥時先將拳毛摘盡後用藥一字隨
左右鼻內嚙之次日目下如線樣微腫是驗也

貼赤眼

取青泥中蛆淘淨曬乾為末赤眼上乾貼之甚妙

貼赤瞎

蘆甘石_{二兩} 密陀僧_{一兩} 黃連 朴硝

右方先將黃連用水熬成汁入童子小便再同熬後
下硝又熬少時用火煨爐甘石紅黃連汁內淬七

次與密陀僧末同為末臨卧貼之

貼赤眼

銅碌 輕粉 牙硝 腦子少許 麝香

右研細末乾貼之

截赤眼方

黃連 綠礬 杏子 甘草 銅碌 各等分

右為麤末水煎洗甚効

碧霞丹 治赤眼暴發并治赤瞎

銅碌 白土 芒硝

右件各分為末丸如皂子大每用白湯研化一丸洗之立効

汾州郭助教家神聖眼藥

蕤仁一兩

金精石二兩

銀精石二兩

爐甘石四兩
燒

赤石脂一兩

滑石二兩

密陀僧二兩

高良薑三兩

秦皮一兩

黃丹一兩
飛過

銅碌三錢

礪砂三錢

礪砂

一錢
半

乳香三錢

盆硝少
用

青鹽

腦子

麝香

已上并少用之

右用東流水三升先入麩仁次下餘味等白沙蜜一斤熬至二升以線絹細濾過澄清入前藥攪之勻

點

視星膏

白沙蜜一斤

揀去蜜滓可
秤十四兩

蜜陀僧

一兩金色者
研極細水淘

可得六
七錢

新柳筭子

四兩去皮心
半乾半炒

右用臘雪水五升與蜜鎔調入藥與柳筭子同貯於

磁瓶中以柳木塞瓶口油絹封勒於黑豈鍋中熬
從朝至暮仍用柳棒閣瓶防傾側用文武火另添
一鍋豈水滾下旋於另鍋中取水添之熬成用重
綿濾淨却入瓶中用井水浸三兩日埋在雪中更
妙頻點為上

復明膏 治外障

白丁香

騰月收者尤佳
水飛秤八錢

揀黃連

一兩

防風

去蘆
對一

指許
一兩

新柳枝

方一寸
者三片

右好四味用新水一升半雪水更妙春秋兩三時冬
月一宿以銀石器內熬至六分濾去滓另用蜜一
斤蜜陀僧研極細末三字入蜜攪勻另熬以無漆
匙撩點下蜜中急攪候沸湯定一人攪蜜一人旋
又攪藥汁都下在內攪勻再熬三兩沸色稍變用
新綿三兩重濾去滓盛器內點眼如常本方每藥
半合用片腦一麥粒大不用亦可

錠子眼藥

黃丹

一兩飛

黃蘗

半兩去皮

黃連

半兩去鬚

枯白礬

半兩

爐甘石

半兩用黃連製

銅碌

半兩

硃砂

三錢

川烏

三錢炮

乾薑

二錢

蝎稍

一錢

信

半錢火燒

乳香

少許

沒藥

少許

右為細末入荳粉四兩澆蜜和就如大麥許銚子於
眼大背頭待藥化淚出為効

治冷淚目昏

密蒙花

甘菊花

杜蒺藜

石決明

木賊

去節

白芍藥

甘草

右件各等分為細末茶清調下一錢服半月後加至

二錢

又方 乾薑肥者為末每用一字洗湯點洗

又方 貝母一枚膩白者胡椒七粒為末點之

單治目昏

荊芥穗 地骨皮 楮實 已上各等分

右為細末煉蜜為丸桐子大每服二十九米飲湯

治一切目昏

川椒

一斤微炒搗取
椒紅約取四兩

甘菊花

四兩
末之

生地黄

一斤

取新者并
作泥極爛

右將地黃泥與前藥末同和作餅子透風處陰乾再
為末以蜜為丸桐子大每服三十九食後茶清送
下

洗眼黃連散

當歸 赤芍藥 黃連 黃蘗 各等分

右細剉以雪水或甜水濃煎汁熟洗治一切風毒赤

目

諸物入眼中

好墨清水研傾入眼中良久即出

點攀睛瘀肉

黃丹

一兩二錢水
飛過候乾

白礬

一兩銀器
內化成汁

右將白礬於銀器內化成汁入黃丹末在內以銀匙

兒攪勻更入乳香沒藥各一錢慢火不住手攪令

枯乾為粉候冷研極細熟絹羅過後入鷹茶一錢

半血竭二分麝香少許輕粉三分粉霜二分共研
極勻如粉再以熟絹羅過細末點之大有神效

青金散

芒硝

一兩

螺青

沒藥

乳香

已上各少許

右為細末每用少許鼻內嚙之

治雀目

真正蛤粉

炒黃色
為細末

右油竭就熟和為丸如皂子納於猪腰子中麻纏蒸

熟食之可配米粥

頭面風疾第四

治黥黯風刺方

苦參

斤一

紅芍藥

冬朮

二味各四兩

玄參

兩一

右為末每用一字用手洗面上

猪蹄膏洗面上黥藥

右用猪蹄一副刮去黑皮切作細片用慢火熬如膏

粘用羅子濾過再入鍋內用蜜半盞又用

白芷

黑荳

去皮

苧蓼

一箇

白芫

白藪

苓苓香

藿香

各一兩

鵝梨

二箇
細切

右將七味藥為末同梨入藥一處再熬滴水不散方
成以絹濾過臨卧塗面次日用漿水洗面

治面風

益母草灰麵湯和燒七遍洗面用之

治面黥黑斑點方

白附子

一兩

白芨

白欬

蜜陀僧

白茯苓

胡粉 已上各等分

右為細末洗淨臨卧以乳汁調一錢塗面但洗光淨
牛乳亦可

治頭風

苦丁香 川芎 藜蘆 各等分

右為細末噙水鼻內嚙之

芎黃湯 治頭目眩暈

大黃 荊芥穗 貫芎 防風 已上各等分

右為麤末大作劑料水煎去滓服之以利為度

耳聾方 單麻子五十箇去皮

右與熟棗一枚同搗丸如棗子大更入小兒乳汁就和每用一九綿裹納於聾耳內覺熱為度一日一易如藥難丸日中曝乾

又方 口噙甘草一枚耳中塞二塊用綿裹立通

腦宣方

皂角不蛀者去皮弦子蜜灸鎚碎水中揉成濃汁
熬成膏子鼻內嚙之口中咬筋良久涎出為度

治耳底方

以枯白礬為末填於耳中立効

治鼻中肉螻蛄

赤龍爪 苦丁香 已上各三十箇

苦葫蘆子

不以多少

麝香

少許

右為末用紙撚子點藥末用之

臍臭方

烏魚骨

錢三

枯白礬

錢三

蜜陀僧

錢一

右為末先漿水洗臭處後用藥末擦之

又方 蜜陀僧不以多少研細先以漿水洗臭處乾擦

烏頭藥

細針沙

炒

蕎麥

炒

已上各一盞

大麥

同亦

醎醋半升與前二味打糊

凡用先使皂角水熱洗淨時前二味糊稀稠得所於

髭鬚上塗之均勻先用荷葉包次用皮帽裏之三
五時辰用溫漿水洗了却收取元針沙其髭髮淨
後用黑藥塗之黑藥方

沒食子

石榴皮

乾荷葉

另搗

已上各一兩

五倍子

訶子皮

百藥煎

金絲礬

碌礬

另研

旋點
諸藥

右將七味為細末炒熟麩五六匙入好醋打麩糊和
藥末再塗髭髮又用荷葉封裹後用皮帽裹之三

五時間洗淨甚黑若更要黑光用猪膽漿水澤洗
如鴉翎

又方

酸石榴 五倍子 芝蔴葉

右同杵碎用絹袋盛之於鐵器內水浸掠髮自黑
治大頭病兼治喉痺方歌曰

人間治疫有仙方 一兩殭蚕二大黃

薑汁為丸如彈大 井花調蜜便清涼

又法 以砭針刺腫處出血立効

治時氣

馬牙硝 寒水石 黍粘子 鬼臼 川大黃

鬼箭草 已上各等分 腦子

少許

右六味為細末用新井花水一盞藥末一二錢入膠子喫外一半留用新水得稠雞翎掃在腫處有風涼處坐

解利傷寒第五

雙解丸

芭荳

六箇去皮油

天麻

二錢半

胭脂

少許

右將芭荳天麻為末滴水丸如秫米大胭脂為衣一日一丸二日二丸三日三丸已外不解先喫冷水一口後用熱水下如人行十里以熱湯投之

又一法無藥處可用兩手指相交緊叩腦後風府穴向前禮百餘拜汗出自解

又一法適於無藥處初覺傷寒傷食傷酒傷風便服太

和湯百沸湯是避風處先飲半椀或以薑汁亦妙
以手揉肚覺恍惚更服半椀又用手揉至恍惚更
服以至厭飫心無所容探吐汗出則已

不卧散

川芎

一兩半

石膏

七錢半

藜蘆

半兩去土

甘草

二錢半生

右為細末口噙水鼻內各嚙之少時喫白湯半椀汗

出解

川芎湯

解利一切傷寒

川芎 藁本 蒼朮

右三味為細末沸湯點三錢須臾覺嘔道便解如不
解再服

諸腰脚疼痛第六

皂角膏

右用醇酒二大椀皂角一斤去皮弦搗碎熬至一半
沸去滓再用前汁入銀石器熬為膏子隨痛處貼
之

治腰脚疼痛方

天麻 細辛 半夏 已上各二兩

右用絹袋二箇各盛藥三兩煮熟交牙熨痛處汗出則愈

牛黃白朮丸 治腰脚濕

黑牽牛 大黃 各二兩 白朮

一兩

右為細末滴水丸桐子大每服三十九食前生薑湯下如要快利加至百丸

婦人病證第七

如聖丹 治婦人赤白帶下月經不來

枯白礬 蛇床子 已上各等分

右為末醋麵糊丸如彈子大以胭脂為衣綿子裏納
於陰戶如熱極再換

洗丸療婦人無子

當歸 熟地黄 已上各二兩 延胡索

澤蘭 已上各一兩半 川芎 赤芍藥

白薇 人參 石斛 牡丹皮 已上各一兩

右為末醋糊為丸每服五十九丸桐子大空心酒下

當歸散 治月經欲來前後腹中痛

當歸

以米醋
微炒

延胡索

生用

沒藥

另研

紅花

生用

右為末溫酒調下二錢服之

治產婦橫生

單麻子三十箇

研爛婦人頂上剃去髮少許以上藥塗之須臾覺腹中提正便刮去藥却於脚心塗之自然順生也

治血崩 蚕沙不以多少

右為末每服三五錢熱酒調下服

又方 管仲去須剉碎

或用酒醋煎三錢煎至七分去滓溫服一服立止

當歸散 治血崩

當歸

一兩

龍骨

一兩 燒赤

香附子

三錢 炒

椶毛灰

半兩

右為細末空心米飲調下三四錢忌油膩雞猪魚兔

等物

蓮殼散

乾蓮蓬燒灰存性

椶櫚皮及毛各燒灰已上各半兩

香附子

炒三錢

右為細末每服三四錢空心米飲湯調下服之

治婦人血枯

川大黃

右為末醋熬成膏就成雞子大作餅兒酒磨化之

三分散 治產後虛勞不進飲食或大崩後

白朮 茯苓 黃耆 川芎 芍藥 當歸

熟乾地黄 已上各一兩 柴胡 人參

已上各一兩六錢

黃芩

半夏

洗切

甘草

炙

已上各六錢

右為麤末每服一兩水一大盞煎至半盞去滓溫服

日二服

治產後惡物上潮痞結大小便不通

芒硝 蒲黃 細墨 各等分

右為末用童子小便半盞水半盞調下服之

治婦人產後虛弱和血通經

當歸

一兩
焙

芍藥

二兩

香附子

三兩
炒

右為細末每服一二錢米飲調下服之無時

治婦人產後惡物不出上攻心痛

赤伏龍肝

竈底焦土研細

用酒調三五錢瀉出惡物立止

治娠婦下痢膿血及咳嗽

白朮 黃芩 當歸 各等分

右為末每服三五錢水煎去滓食前加桑白皮止嗽
百花散 治婦人產中咳嗽

黃蘗

桑白皮

用蜜塗慢火
炙黃為度用

二味各等分

右為細末每服一二錢水一盞入糯米二十粒同煎
至六分以款冬花燒灰六錢攪在藥內同調溫服
之

治婦人吹妳

以樺皮燒灰存性熱酒調下三錢食後服之

又方 以馬明退燒灰五錢輕粉三錢麝香少許

右為細末每服二錢熱酒調下服之

又方 以皂角燒灰蛤粉和熱酒將來調數字下得啞

嚙笑呵呵

又方 以淘米木杓上砂子七箇酒下以吹簾枝透乳

孔

欬嗽痰涎第八

九仙散

九尖草蘇子葉

錢三

飛過白礬

錢二

右用猪肉四兩薄批基盤利開摻藥二味荷葉裏文
武火煨熟細嚼白湯送下後用乾食壓之

止嗽散

半夏

一兩半湯
洗七次

枯白礬

兩四

右二味為末生薑打麩糊和丸桐子大每服三二十
丸空心溫酒送下

八仙散

款冬花 佛耳草 甘草 鍾乳 鵝管石

白礬 官桂 井泉石 已上各等分

右為細末每服三錢水煎服之 又一方摻咽喉中

三才散 治嗽

人參 天門冬去心 熟乾地黄 已上各等分

右為細末煉蜜為丸如櫻桃大含化服之

三分茶

茶二錢 蜜二兩 蕎麥麵四兩

右以新水一大椀約打千餘數連飲之飲畢良久下
氣不可停人喘自止

石膏湯 治熱嗽

石膏

亂文者
二兩

人參

半兩
去蘆

甘草

半兩
炙

右為末每服三錢新水或生薑汁蜜調下亦可

三生丸 治嗽

胡桃仁

一兩

生薑

一兩去
皮細切

杏仁

一兩

右二味同研為泥就和作劑可得十三四丸臨卧爛

嚼一丸可數服即止

化痰延壽丹

天麻

兩半

枸杞子

二兩半

白礬

一兩半半生半熟

半夏

一兩半湯洗七次用

乾生薑

一兩半

人參

一兩

右為細末好糯酒拌勻如砂糖用蒸餅劑蒸熟去皮
杵白搗四五十杵便丸如乾入酒三點丸如小豈
大每服三五十九生薑湯下

半夏湯 治噦欲死者

半夏

一兩洗

生薑

二兩

右二味細切水二盞煎至八分去滓作二服食後

治肺痿喘嗽 漢防已

右為細末每服三錢漿水一盞同煎至七分和滓溫服

治年高上氣喘促腫卧難禁

右蘿蔔子搗羅為末白湯浸調五六錢食後服之或炒或用糖蜜作劑為丸服之

麻黃湯 治因風寒衣服單薄致嗽

麻黃

不去節

甘草

生用

杏仁

生用

右為麤末每服三二錢水煎溫服

心氣疼痛第九

失笑散 治急心痛并男子小腸氣

五靈脂

半兩

蒲黃

半兩炒

右為末每服三錢醋半盞煎二沸再入水半盞再煎

二沸空心食前和滓溫服之

又方 醋一盞加生白礬一小塊如皂子大同煎至七分溫服立愈

又方

高良薑

半兩

山梔子

半兩

蔚金

半兩

又方 以新嫩槐枝一握切去兩頭水二盞煎至一盞

去滓分二服熱服

又方

沒藥 乳香 薑黃 玄胡索 已上各等分

右為末每服三錢水煎食後服之

小腸疝氣第十

抽刀散

川棟子

一兩破四分芭莖三箇
同炒黃色去芭莖用之

茴香

一兩鹽炒
黃色去鹽

之用

右為細末每服三錢葱白酒調下空心服之

治陰痛不可忍

吳茱萸

二兩洗七遍
焙乾微炒

檳榔

一兩

茴香

一兩

右為細末醋糊為丸熱酒送下十九食前服之

治偏腫 茴香 甘遂

右二味各等分為末酒調二錢食前服

又方 巴戟去心 川練炒 茴香炒

等分為末溫酒調二錢服之

治小兒疝氣腫硬

地龍不去土 為末唾津調塗病處

治小腸氣痛

全蝎

一兩

茴香

炒黃
一兩

右為細末醋糊和丸如梧桐子大如發時每服五七

十九溫酒送下食前

治小便渾濁如精之狀

沒藥 木香 當歸 已上各等分

右為末以刺棘心自然汁為丸如桐子大每服五七

丸食前鹽湯下

治小便頻滑數不禁

知母 黃蘗 已上各等分

右對碎酒浸透炒微黃為末水丸梧桐子大如服藥
前一日休喫夜飯來日空心立服米飲湯下一百
丸只服一服効後喫淡白粥一頓

蕩疝丹

川練子

炒

茴香

炒

破故紙

炒

已上各半兩

黑牽牛

二錢

青皮

陳皮

已上各三錢

廣茂

四錢

木香

四錢

右八味為細末用好酒打麵糊為丸如桐子空心食
前溫酒下三十九

灸疝法放疝邊豎紋左右交弦灸七壯

腸風下血第十一

神應散 治腸風痔漏

牛頭角腮 一隻酌
中者

猪牙皂角 七
定 穿山甲 四十
九片

或圓取或四方
取或一字取

蝟皮 一
兩 蛇退皮 一
條

右五味鉗碎盛在小口磁器內鹽泥固定日中曝乾

瓶口微露出煙用文武火燒紅赤煙微少取出投
冷為細末如服藥日先一日臨卧細嚼胡桃仁半
箇如糊用溫醇糯酒一盞送下不語便睡至次日
交五更服藥驗病年月遠近或秤三錢五七錢用
水半大碗醇糯酒半大盞相合熟和藥服之至辰
時再服

又一服再依前服藥不須用胡桃仁久病不過七服
忌油膩魚鱉雞兔猪犬等物大有神効

温白丸 治臟毒下血

椿根白皮

凡引者去麁皮
酒浸晒乾服

右為末棗肉為丸如梧桐子大每服三五十九淡酒

送或酒糊丸

治脫肛痔漏

胡荽子

一升

乳香

少許

粟糠

半升或一升

右先泥成爐子止留一小眼可抵肛門大小不令透

煙火薰

治脫肛

曼陀羅花子

蟬殼

一對

椽椀

十六箇

右搗碎水煎三五沸入朴硝熱洗其肛自上

治痔漏下血不止

紫皮蒜

十箇獨
料者妙

大椒

六十
箇

荳豉

四
兩

右搗爛為泥丸彈子大空心細嚼一丸鹽湯下日三服

治痔漏

白牽牛頭末

四兩

沒藥

一錢

右同為細末如欲服藥先一日不食晚飯明日空心將獐猪精肉四兩燒令香熟薄批摻藥末在內裏之漸又細嚼食盡然後用宿蒸餅壓之取下膿血為効量病大小虛實加減服之忌油膩濕麵酒色三日外不忌一服必効或用淡水煮肉熟用上法亦可又云服前一日不食午飯并夜飯明日空心用之

又方 黑白牽牛一合炒黃為末猪肉四兩切碎炒熟
與藥末攪勻只作一服用新白米飯三二是壓之
取下白虫為効

又坐藥 鯉魚鱗二三甲以薄編圍裏如棗核樣納之
痛即止

淨固丸 治痔漏下血痒痛

槐花 炒 枳殼 去 已上各一兩

右為細末醋糊為丸如梧桐子大每服二十九米飲

湯下空心食前十服見効

黃連貫衆散 治腸風下血

黃連 雞冠花 貫衆 大黃 烏梅 已上各

一兩 甘草 三錢 枳殼 炮 荆芥 已上各一

兩

右為細末每服二大錢溫米飲調服食前

槐荆丸 治痔漏

荆芥 槐花 等分為末水煎一大椀服丸亦可

又方 荳豉

炒

槐子

炒

各等分

右為末每服一兩水煎空心下

薰漂藥

鳳眼草

赤皮葱

椒

三味搗麤同漿水滾過坐盆令熟氣薰痔但通手漂之如此不過三次愈矣

小兒病證第十二

治小兒脾疳 蘆薈 史君子 已上各等分

右為細末米飲調下一二錢服之

玉筋散 治小兒馬脾風

甘草

一寸
水煎

甘遂末

一字

右同油蜜生薑銀釵兒攪調下後用冷水半盞調奪

命散

奪命散 治小兒胸膈喘滿

檳榔 大黃 黑白牽牛 各等分皆當各半生

熟用之

右為細末蜜水調服

治小兒斑瘡入眼

麩炒蒺藜灸甘草 羌活防風等分搗

每服二錢漿水下 撥雲見日直到老

治瘡疹黑陷

鐵腳威靈仙

一錢
炒末

腦子

一分

右為末用溫水調下服之取下瘡痂為効

治小兒黃瘦腹脹

乾雞糞

一兩

丁香末

一錢

右為末蒸餅為丸如小豈大每服二十九米飲湯送

下

黃連散 治小兒頭瘡

川黃連

黃蘗

去麁皮

草決明

輕粉

已上各

等分

右為細末用生小油調藥於瘡上塗之立愈

治斑瘡倒壓方

胡桃

一箇燒
灰存性

乾胭脂

三錢

右為末用胡荽煎酒調下一錢服之

又方 人牙燒灰存性研入麝香少許每服三錢溫酒調下少許服之無時

又方 小豬兒尾尖取血三五點研入腦子少許新水調下食後與服之

又方 人中白臍月者最佳通風處以火煨成煤水調三五錢陷者自出

消毒散 治瘡疹已未出咽喉腫痛

牛旁子

二兩炒

甘草

半兩對炒

荆芥

一分

右為麤末每服三錢水一盞半煎至七分去滓溫服
無時

治小兒斑瘡入眼

猪懸蹄甲

二兩乾鍋內鹽泥
固塗燒焦為末

蟬殼

二兩去土
取末一兩

羚羊角

鎊為細末
用研之

右二味為末研入羚羊角細末一分拌勻每用一字
百日外兒服半錢三歲已上服三錢新水或溫水
調下日三四服夜一二服一年已外則難治之

又方 透耳藥

朱砂

錢一

粉霜

分八

右研為細末水調少許用匙杓頭傾一兩點於耳內
中後用

白菊花 菘荳皮 穀精草 夜明沙

右四味為末用米泔半椀熬成去滓入乾柿十餘箇
再同熬每日喫三兩箇仍飲煮乾柿湯

又方 治小兒斑瘡入眼

朱砂 腦子 水銀 麝香 已上各等分

右四味研為細末用水銀調滴入耳中

發斑藥

珠子七箇

研碎用新水調勻服之

破傷風邪第十三 陰毒傷寒亦附于此

長砂奪命丹

鳳凰臺

川烏頭

生已上各二錢

麝香

少許

朱砂

少許

右為細末棗肉和為丸如彈子大朱砂為衣鰾酒送下量病人年甲虛實加減用之小兒半丸以吐為

度不止以葱白湯解之

治破傷風

病人耳塞并爪甲上刮末唾津調塗瘡口上立効無
瘡口者難用

治破傷風

烏梢尾

一箇

兩頭尖

四箇

全蝎

四箇

右三味為細末另用石灰

五升

柴灰

五升

沸湯

五升

淋灰水澄清下藥熬之鐵鍋器內攪成膏子如稠

用唾津調先用溫漿水洗淨瘡口後塗藥即時藥
行吐黃水一日以新水漱口即愈

又方 天南星

半生
半熟

防風

去
蘆

二味各等分

右為末清油調塗瘡上追出黃水為驗

又方 白芷

生用

草烏頭尖

生用
去皮

二味等分

右為末每用半錢冷酒一盞入葱白少許同煎服之
如人行十里以葱白熱粥投之汗出立愈甚者不

過二服

又方蜈蚣散

蜈蚣頭 烏頭尖 附子底 蝎梢 四味各等

分

右為細末每用一字或半字熱酒調下如噤了牙關
用此藥斡開灌之

治陰毒傷寒破傷風

草烏頭 七箇文武火燒熟去牙頭

麝香 半錢

朱砂 一錢

右為細末每服一字以熱酒調下食前服之汗出為

度忌猪兔魚鱉粘殺肉

治陰毒傷寒

用芥末以新水調膏藥貼臍上汗出為効

又方以牡蠣乾薑末新水調塗手心握外腎汗出為

効

諸風疾證第十四

不老丹 治一切諸風常服烏髭注顏明目延年

蒼朮四斤

米泔浸軟竹刀子刮去皮切片子內
一斤用椒三兩去白炒黃去椒一斤鹽

三兩炒黃去鹽一斤好醋一升煮
汁盡一斤好酒一升煮令汁盡

何首烏二斤

米泔浸軟竹刀子刮去皮切片子
用瓦甑蒸先鋪黑豈三升乾棗二升

上放何首烏上更鋪棗二升黑豈三升用炊單
復著上用盆合定候豈棗香熟取出不用棗豈

地骨皮

去麤皮
秤二斤

右件於石臼內搗為細末候有椹汁搜和如軟麵劑
相似磁盆內按平上更用椹汁藥上高三指用紗
綿帛覆護之晝取太陽夜取太陰使乾再搗羅為
細末煉蜜和丸如梧桐子大空心溫酒下六十九

忌五辛之物

四仙丹

春甲乙採杞葉

夏丙丁採花

秋庚辛採子

冬壬癸採根皮

右為細末以桑椹汁為丸每服五十九丸茶清酒任下
起死神應丹 治癱瘓四肢不舉風痺等疾

蘇黃

去根節河水五升
去滓可成膏子五斤

白芷

二兩

桑白皮

二兩

蒼朮

二兩
去皮

甘松

二兩
去土

川芎

三兩

苦參

三兩
半

加浮萍二兩

已上各為細末用膏子和丸如彈子大每服一九溫酒一盞化下臨卧服之微汗出勿慮如未安隔三二日再服手足即時輕快及治卒中風邪涎潮不利小兒驚風服之立効

愈風丹

芍藥 川芎 白殭蚕炒 桔梗 細辛去葉 羌

活 已上各半兩 麻黃去節 防風去蘆 白芷

天麻

全蝎

灸已上
各一兩

甘草

三錢

南星

半兩生
薑製

朱砂

半兩
為衣

右為細末煉蜜為丸如彈子大每服一丸細嚼茶酒

吞下

香芎散

治偏正頭風

貫芎

香附子

炒

石膏

亂紋者
良水飛

白芷

甘草

薄荷

已上各一兩

一方川烏頭

半兩炮去
臍皮用之

右為細末每服二錢溫酒或茶清調下服之

妙功十一丸 治癩

丁香 木香 沉香 乳香 麝香 荆山稜炮

廣茂炮 黑牽牛微炒 黃連 雷丸炒 鶴虱炒

胡黃連 黃芩 大黃焙 陳皮 青皮 雄黃

熊膽 甘草炙 各二錢半 赤小豈三百六十粒煮

白丁香直尖者三百六十箇 輕粉四錢 芭豈七箇

右二十三味為細末赤小豈爛煮研泥同蕎麵打糊
和作十一丸朱砂為衣陰乾服時水浸一宿化一

丸大便出隨病各有形狀取出為驗或作化一番
不可再服曾經火灸者不治遠年愈効

朱砂滾涎散 治五癩

朱砂

水飛

白礬

生用

赤石脂

消石

已上各等

分

右同為細末研蒜膏如丸棗豈大每服三十九食後
荆芥湯下

又方 末砂不以多少水飛研為細末

右用猪心血浸蒸餅為丸如菘豈大每服二十九空
心金銀湯下之

治諸風疥癬及癩

浮萍一兩 荆芥 川芎 甘草 麻黃 已上各

半兩 或加芍藥 當歸

右為麤末每服一兩水一椀入葱白根豈豉同煎至
一半無時服汗出為度

治癩塗眉法

半夏

生用

羊糞

燒

已上各等分

右為末生薑自然汁調塗

五九散

治癩

地龍

去土

蟬殼

白僵蚕

凌霄

全蝎

已上各等九箇

右同為末只作一服熱酒調下浴室中汗出粘臭氣

為効

苦參散

治癩風

苦參

取頭末
秤二兩

猪肚

一箇
去脂

右以苦參末摻猪肚內用線縫合隔宿煮軟取出洗去元藥先不喫飯五頓至第二日先飲新水一盞後將猪肚食之如吐了再食之食罷待一二時用肉湯調無憂散五七錢取出小虫一二萬為効後用皂角一斤不蛙者去皮弦及子搥碎用水四椀煮至一椀用生絹瀝去滓再入苦參末攪熟稀麵糊膏子相似取出放冷後入餘藥相和藥附于後

何首烏

二兩

防風

一兩半

芍藥

五錢

人參

三錢

當歸

一兩
焙

右為細末入皂角膏子為丸如桐子大每服三五十

丸溫酒或茶清送下不計時候日進三服後用苦

參荊芥麻黃煎湯洗冷

水腫黃疸第十五

治通身黃腫

苳蒂焙乾三四錢

右為細末每用半字於鼻內吹上日一度併吹三日
如不愈後用黃芩末之煎湯五錢下

治蠱氣

取環腸草不以多少熬乾水煎利小便為度

治黃疸面目遍身如金色

茺蒂

一十
四箇

母丁香

一
箇

黍米

四
十
九
粒

右先搗茺蒂為末次入二味同為細末每用半字夜
卧令病人先噲水一口兩鼻內各半字吐了水令

病人便睡至夜或明日取下黃水旋用熟帛搵了
直候取水定便服黃連散病輕者五日重者半月
黃連散 治黃疸大小便秘澀壅熱

黃連

三兩

川大黃

二兩對碎醋
拌炒過用之

黃芩

甘草

炙

各一兩

右為細末每服二錢食後溫水調下一日三服

治水腫不利小便非其法也故內經云濕氣在上以
苦吐之濕氣在下以苦瀉之吐瀉後長服益元散

加海金沙煎以長流水服之則愈矣大忌脚膝上
針刺出水取一時之効後必死矣尤忌房室濕麪
酒醋鹽味犯之必死

木通散 治水腫

海金沙 舶上茴香 巴戟 大戟 甘遂

芫花 木通 滑石 通草 已上各等分

右為細末每服三錢以大麥麪和作餅子如當二錢

大爛嚼生姜湯送下

下痢泄瀉第十六

治痢

紫苑 桔梗 赤芍藥 白朮 已上各等分

右為細末每服三五錢細切羊肝拌之作麵角兒燒服之後用白湯送下食前

治痢

杜蒺藜炒碾為末酒調下三兩服

蒜豉丸 治痢

蒜為泥 豉為末

右二味相和作丸如梧桐子大米飲湯下五七十九

食前

治大人小兒吐瀉腹脹胸膈痞閉

五靈脂 青皮 陳皮 硫黃 芒硝 已上各

等分

右將硝黃於銚子內以文武火鎔開用匙刮聚自然
結成砂子取出研碎與前三藥同末麵糊為丸如

菘豈大小兒麻子黃米大每服二十九量虛實加
減米飲湯送下無時

又方治瀉 車前子不以多少

右為細末每服二錢米飲湯調下服之水穀分吐瀉
止

諸雜方藥第十七

治消渴

揀黃連

二兩八
九節者

右剉如咬咀以水一椀煎至半椀去滓頓服之立止

百日還丹

佛茄子 樟柳根 已上各等分

右為末枸杞汁和為丸如雞頭大每服十九新水送

下

酒癥丸

芭荳

筒十六

全蝎

筒十五

雄黃

塊一

白麵

兩五

右為末研勻滴水丸如豌豆大每服一丸如痛飲者

二丸

立應丸

治臟腑泄痢膿血不止腹中疼痛

乾姜

一兩炮
另末

百草霜

一兩

連皮芭荳

一兩
炒

杏仁

一兩同芭荳和皮炒黑
色杵為泥後入霜研

右用黃臘四兩鎔開蠟次入前四味用鐵器攪勻旋

丸桐子大每服三五丸甘草湯下白痢用乾姜湯

下食前若水瀉溫水下

反胃

黃蘗末熟酒調三五錢食後服之

治小便多

滑數
不禁

金剛骨為末以好酒調下三錢服之

又方

白茯苓

去黑皮

乾山藥

去皮白礬水內湛過慢火焙乾用

右二味各等分為細末稀米飲調下服之

治卒淋痛

芫花

三錢

茴香

二錢微炒黃

右為細末水煎服之

治趺方

以水調白麵稀稠得所糊趺上以紙封之明日便

乾如不曾破者剝去麩便行

治大便秘

生麻子不以多少研爛水調服之

坐劑治大便久秘攻之不透者用之

又用蜜不計多少慢火熬令作劑稀則粘手硬則
脆稀稠得所堪作劑搓作劑樣如棗核大麩如筋
長一寸許蘸小油內于肛門中坐良久自透有加
鹽少許以素問鹹以軟之

交加飲子 治久瘡不已山嵐瘴氣

肉苳蔻

十一箇 麩裏燒一箇

草苳蔻

二箇同 上法用

厚朴

二寸 一半

生用一半 熟用 生姜製過 用之

甘草

二寸半 一半生 用一半 灸用

生薑

二塊

如棗紙裏煨 半生半熟

右為末每服分一半水一椀銀石器內煎至一大盞

去滓溫服發日空心未愈則再服

天真丸 補虛損

佛袈裟男用女女用男以新水四擔洗盡血水以

酒煮爛為泥

葳靈仙

兩一

當歸

兩半

硝砂

兩一

蓮子肉

炒熟
兩三

乾地黄

酒浸
兩一

廣茂

兩半

甘草

兩二

牡丹皮

兩一

牛膝

酒浸
兩一

木香

兩半

白朮

兩一

白茯苓

兩一

右為細末與君主同搗羅為細末酒浸蒸餅為丸梧

桐子大每服三五十九日三服

取雕青

水蛭取陰乾為末先以白馬汗擦青處後用白馬

汗調藥塗之

治蚰蜒入耳中

右用貓尿灌耳中立出取貓尿用盆盛貓以生薑擦

牙

又方 黑驢乳灌耳中亦出

又方 以濕生虫研爛塗於耳邊自出

碎穀絕食第十八

大荳五升

淘淨蒸三遍
去皮為細末

大麻子五升

湯浸一宿
漉出蒸三

遍令口開去
皮為細末

糯米五升

淘淨共白茯苓一處蒸熟

白茯苓

五兩

去皮同上糯米一處蒸熟為用

右將麻仁末一處搗爛如泥漸入豆黃末同和勻便
團如拳大再入甑蒸從初更着火至半後夜住火
至寅時出甑午時曬乾搗為末服之以飽為度不
得喫一切物用麻子汁下第一頓一月不飢第二頓
四十日不飢第三頓一千日不飢第四頓永不飢
顏色日增氣力加倍如渴飲麻仁汁轉更不渴滋

潤五臟若待喫食時分用葵菜子三合為末煎湯
放冷服之取其藥如後初間喫三五日白米稀粥
湯少少喫之三日後諸般食飲無避忌此藥大忌
欲事

又方 於苓餅子

白茯苓四兩為末 頭白麵一二兩

右同調水煎餅麵稀調以黃蠟代油煉成煎餅蠟可
用三兩飽食一頓便絕食至三日覺難受三日後

氣力漸生熟菓芝蔴湯米飲凉水微用些小潤腸
胃無令涸竭開食時用葵菜湯并米飲稀粥少
服之

又方 保命丹

人參

五兩

麻子仁

二兩炒去皮

乾地黄

苾蓐子

炒

兔絲子

酒浸

已上各二兩

生地黄

乾大棗

各三

兩

大荳黃

一升煮去沫

黑附子

一兩生用一兩炮去皮

白

茯苓

茯神

地骨皮

去麤皮

蔓精子

煮熱

杏仁

去皮
尖炒

麥門冬

炒去
心用

地膚子

蒸七
遍

黍米作粉

粳米作粉

白糯米作粉

天門冬

去
心

車前子

蒸

側柏葉

煮三
遍

已上各二兩半

右同為細末各揀選精粹者鵬月內合者妙他時不
可合日月交蝕不可合如合時須揀好日淨室焚
香志心脩合勿令雞犬婦人見又將藥末用蠟一
斤半瀝去滓白蜜一斤共二斤半一處鎔開和勻
入臼杵二千下微入酥油丸如梧桐子大每服十

丸服至五日如來日服藥隔宿先喫糯米一頓粳
米白麵皆可次日空心用糯米粥飲送下如路行
人服遇如好食喫不妨要止便止如喫些小蒸餅
爛嚼嚥或乾菓子以助藥力不喫更妙忌鹽醋日
後退下藥來於長流水中洗淨再服可百年不飢

儒門事親卷十五